

Ráðstefnur 2013

Fjölmargar áhugaverðar norrænar og alþjóðlegar ráðstefnur um mál og málfræði, orðabókafræði, nafnfræði og málrækt verða haldnar á árinu. Hér á eftir eru nokkrar þær helstu taldar upp í tímaröð og gerð stuttlega grein fyrir viðfangsefni hverrar um sig.

Norræn málvísindaráðstefna í Reykjavík

25. norræna málvísindaráðstefnan (*25th Scandinavian Conference of Linguistics*) verður haldin í Háskóla Íslands dagana 11.–13. maí undir merkjum samtaka norrænna málvísindamanna (NAL: *Nordic Association of Linguists*). Gestafyrirlesarar verða Elisabeth Engberg-Pedersen, Hans-Martin Gärtner og Alec Marantz. Tólf málstofur hafa verið auglýstar en auk þess verður fluttur fjöldi annarra fyrirlestra um margvísleg málvísindaleg efni. Ítarlegar upplýsingar um ráðstefnuna, m.a. um skráningu á hana, er á vefsíðunni <http://conference.hi.is/scl25/>.

Máltækniráðstefna í Osló

NODALIDA 2013, 19. norræna ráðstefnan um tölvumálvísindi (e. *computational linguistics*), verður haldin á vegum *The Northern European Association for Language Technology* (NEALT) í Háskólanum í Osló 22.–24. maí. Þrír boðsfyrirlestrar verða fluttir á ráðstefnunni, fimm málstofur hafa verið skipulagðar og fjöldi annarra fyrirlestra á sviði tölvumálvísinda og máltækni verða í boði. Allar upplýsingar um ráðstefnuna má nálgast á vefsíðu hennar: <http://www.hf.uio.no/iln/english/research/news-and-events/events/conferences/2013/nodalida/index.html>.

Ráðstefna um málstöðlun og forskrift

Ráðstefna um forskrift og fyrirmæli um mál og málnotkun – *Prescriptivism Conference 2013* – verður haldin í háskólanum í Leiden í Hollandi 12.–14. júní. Þetta er í fjórða sinn sem slík ráðstefna er haldin og í þetta sinn er þemað „Forskrift og hefð í máli“ (*Prescription and Tradition in Language*). Frekari upplýsingar eru á vefsíðu ráðstefnunnar: <http://hum.leiden.edu/lucl/prescriptivism-conference/>

Ráðstefna um máltilbrigði í Evrópu

Sjöunda alþjóðlega ráðstefnan um máltilbrigði í Evrópu (ICLaVE: *International Conference on Language Variation in Europe*) verður haldin í háskólanum í Þrándheimi 26.–28. júní. Auglýstar hafa verið fimm málstofur auk stakra fyrirlestra og þriggja boðsfyrirlestra. Á ráðstefnunni verður fjallað um ýmis efni sem tengjast rannsóknum á máltilbrigðum og meðal þátttakenda verða málvísindamenn á sviði sögulegrar málfræði, félagsmálfræði og mállyskufraði. Frekari upplýsingar eru á vefsíðu ráðstefnunnar: <http://hist.no/iclave7/>.

Ráðstefna um söguleg málvísindi

21. alþjóðlega ráðstefnan um söguleg málvísindi (ICHL: *International Conference on Historical Linguistics*) verður haldin í Háskólanum í Osló 5.–9. ágúst. Fimm gestafyrirlestrar verða fluttir á ráðstefnunni auk fjölda annarra fyrirlestra og auglýstar hafa verið sex málstofur um fjölbreytileg efni. Ítarlegar upplýsingar eru um ráðstefnuna á vefsíðunni <http://www.hf.uio.no/ifikk/english/research/events/ichl2013/>.

Norræn ráðstefna um orðabókafræði

Tólfta ráðstefnan um orðabókafræði á Norðurlöndum verður haldin í nafni NFL (*Nordisk forening for leksikografi*) í Osló 13.–16. ágúst. Þrjár gestafyrirlesarar halda erindi á ráðstefnunni: Arleta Adamska, Victoria Rosén og Lars Trap-Jensen. Aðrir fyrirlestrar munu fjalla um ólík efni á sviði orðabókafræði, fræðilegrar jafnt sem hagnýtrar. Frekari upplýsingar má nálgast á vefsíðunni <http://nordisksprogkoordination.org/nfl/konferencer-og-symposier/12.-konferanse-om-leksikografi-i-norden>.

Frændafundur

Færeysk-íslenska málþingið *Frændafundur* verður haldið í áttunda skipti 24.–25. ágúst og í þetta sinn fer það fram í Þórshöfn. Málþingið er þverfaglegt og óskað er eftir fyrirlestrum af ólíkum fræðasviðum um efni sem eru áhugaverð fyrir Færeyjar og Ísland. Frekari upplýsingar eru á vefsíðunni <http://setur.fo/foeroyamalsdeildin/frændafundur-2013/>.

Þing norrænu málnefndanna

Norrænt málnefndaþing (*Nordisk sprogmede*) verður haldið á Akureyri 28.–29. ágúst 2013. Þema þingsins er *De nordiske sprogs fremtid indenfor informa-*

tionsteknologien. Máltækni verður sífellt mikilvægari en tungumál sem fáir tala, eins og norrænu málin, standa höllum fæti gagnvart henni. Á þinginu verður rætt um hver staða tungumála á Norðurlöndum er gagnvart nýrri tækni og hvernig bæta megi stöðuna. Þing norrænu málnefndanna er haldið árlega og var síðast haldið á Íslandi árið 2006.

Norrænt málþing um nafnfræði

Málþing NORNA, norrænna samtaka um nafnfræðirannsóknir, verður haldið í 43. skipti í Halmstad í Svíþjóð 6.–8. nóvember. Þema málþingsins að þessu sinni er „Nýjungar í nöfnum og nafnavenjum“ (*Innovationer i namn och namn-mönster*). Frekari upplýsingar um þingið má finna á vef samtakanna: <http://www2.sofi.se/NORNA/NORNA.html>.